

35

verderpt hat. User solchen und andern ursachen ist das  
schlofs abgangen und das dach sampt allem holzwerk, seit-  
mals das sonst in einer kürze het megen einfallen, ab den  
mauren gethon worden, zu dem das gespenst, das von un-  
5 verdecktlichen jaren darin terminiert, den dienstleuten, weifs-  
und manspersonen, sovil widerdriefs angethon und erschreckt,  
das es ein übermase gewesen und niemands gern darin ge-  
dientet. Man hat manichmal seithere, als das schlofs öde ge-  
standen, etwann ein halbe, etwann ain ganze nacht liechter  
10 in den stuben gesehen, oder doch so hat man vermaint, es  
seien liechter darin, so hell ist es gewesen. Vilmals haben  
die nechsten nachpurn ein grofs gerumpel gehört, aber man  
hat nit wissen megen, was das gewesen. Aber was will ich  
von dem sagen, das, seithere das schlofs öde gestanden,  
15 sich darin begeben? Ich bin [1022] manche nacht selbs darin  
übernacht gewesen und ain diener bei mir in der cammer,  
auch ain nachtlicht gehapt. Vil seltzames ding hab ich  
gehört, gleichwol mir, Gott lob! nicks ungehewrs nie zu  
sehen worden. Wie oft aber ist mir gewesen, als ob lauter  
20 geisen im haus umbher laufen, auch etwann die under stiegen  
hinab in hof springen! Ich bin uf ein zeit dohin selb ander  
kommen, nach dem nachtesen schlaffen gangen. Umb mitter-  
nacht erwacht, hab ich ein gedöfs und schlachen (wie dann  
der rossstal domals war) under mir gehört, nicht anders,  
25 als ob die ross ledig, einandern bisen und schlüegen, nach-  
gends, als ob sie ganz ledig und frei im hof umbher liefen,  
so urschaidenlich, als ob es helles tags beschehe. Ich wackt  
den diener, hiefs Enderle Scheffer, ein unverzagt man und  
der domals gleichwol hart schlief, und zweifelt einmal, es  
30 gieng nicht recht zu, sonder das gespenst trib also sein  
affenwerk, die zuhörer damit zu laichen. Iedoch, als mich  
so gründtlich bedauchte, ich hörte die ross im hof laufen,  
zu zeiten still steen, an ainandern schmacken und schnar-  
chen und dann wider umb sich schlagen, do liefs ich den  
35 diener, der auch meiner mainung war, ufsteen. Der thett  
sich eilendts an, nam sein schwert und lief mit eim liecht  
hinab in den stall. Er kam aber gleich wider, hett den stal  
beschlossen gefunden, wie er solchen den abendt darfor ge-  
lasen und die ross in der strewe ligendt schlafen. Gleichwol  
40 sahe er kaim mentschen gleich. Nit waifs ich, was er ge-  
sehen oder gehört; er wolt mir uf meine fragen nit vil ant-  
wurt geben, legt sich wider nider. Morgends wolt ich auch

3\*